



Sabanetero ta traha mesanan costoso for di palo di Kwihi

SAVANETA. — Un palo di kwihi tin su balor tambe. Talvez pa algun no, pero pa sr. Jaco Henriquez di Savaneta 19B, si e ta algo masha necesario. E senjor aki ta gana su pan for di esaki. Un simple palo di kwihi e ta transforma den un luna di tempo na un preciosidad di un mesa.

E trabao aki e ta haci caba pa mas di 1 anja y esnan cu ta den posesion di un di e mesanan caba no por stop di papia di e calidad di e producto Arubano aki.

Mi tambe por

„Loke nan por mi tambe por”, asina parece Jaco Henriquez mester a pensa tempo cu mas di 1 anja pasa el a mira un mesa den Aruba Caribbean Hotel traha na Mexico for di un palo di mata cu ta crece aya. Ki clase di palo e ta, Sr. Henriquez no sabi, pero e mesa aki a inspirele pa e tambe purba.

„Kwihi no por laga di sirbi”, el a pensa y pronto e tabata den mondinan mas leuw di Aruba ta kap palonan di kwihi. „E palonan no mester ta mas hoben cu diez anja, sino e vernis no ta sinta bon riba dje ora cu e mesa ta cla. E palo mester ta bieuw y seco seco”, asina el a conta nòs ayera mainta den su taller chikito pega cu su cas.

E traha mas duro ta e zaagmento di e kwihi. Esaki ta worde parti den dos, pero varios biaha tur e trabao sa ta pornada, ora cu resulta cu e corazon di e palo tin buraco aden. E ora e palo ey ta worde benta afor y tin cu zaag un otro. Despues ta bini e trabao di schaaf e palo haciele lizo y dunele forma cu e beitel. Esaki ta tuma majoria di e trabao.

For di mainta te atardi Sr. Henriquez di 33 anja, casa cu 6 jiu, ta traha riba e mesanan. Den 1 luna di tempo e ta den estado di entrega na e cliente un mesa lumbrante cu color y figuranan bunita cu lo dura pa bida largo.

Un pida mueble tur afó, ta loke cu nos por a comproba riba uno cu pa casualidad e tabatin den e taller.

Trinta caba

Trinta mesa e senjor aki a traha caba den tempo di 1 anja y tres luna. Tin ocasion cu e ta traha dos mesa den un luna, esaki ta depende di e

Na e momento aki Sr. Henriquez ta cabando dos pedido pa Sr. J. Vernhout, kende lo manda nan pronto pa Hulanda na unda tambe nan por cera conoci cu un arte netamente arubano.

Un poco preocupa

Por ultimo e senjor aki a conta nos cu ta su intencion na haci pronto un biahe pa Bonaire, pa aya busca un calidad nobo di palo y e ta pensa riba esun cu nan ta jama „brasi” (un palo corra manera candela). „Aki na Aruba palo di kwihi a bira hopi scars”, ta opinion di Sr. Henriquez, kende ta hanja cu prome aya tabata mas facil pa hanja e palo aki. Pero e mas grandi aspiracion di e senjor aki ta pa trece mesanan mas bunita ainda cu esnan traha te awor. Y cu si esnan te awor ta netchi dr. H. Dennert, famia 'S. Arends di Savaneta y varios otro habitante di Seroe Colorado por comproba.

Den nan cas e mesa aki ta ocupa un lugar importante entre e demas mueblenan.